

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)1

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

1. Apakah rancangan Kerajaan Negeri untuk mengembalikan kepercayaan terhadap industri pelancongan perubatan atau *medical tourism* selepas impak pandemik COVID-19?

**YB. YEOH SOON HIN
MENJAWAB BAGI PIHAK Y.A.B. KETUA MENTERI**

1. Rancangan Kerajaan Negeri untuk mengembalikan kepercayaan terhadap industri pelancongan perubatan atau "*medical tourism*" selepas impak pandemik COVID-19 adalah seperti berikut:
 - (i) Pelancongan perubatan di peringkat domestik dibenarkan beroperasi semasa tempoh Perintah Kawalan Pergerakan Pemulihan (PKPP). Oleh itu, keutamaan adalah diberikan untuk menggerakkan semula sektor pelancongan dengan memberi fokus kepada pasaran pelancongan domestik. Kempen promosi dan pemasaran giat dijalankan dengan sasaran kepada pelancong domestik. Pameran pelancongan dalam negara seperti *Penang International Travel Exchange (PITE)* yang akan diadakan pada 14-16 Oktober 2020 dan *Business Events Penang (BE@Penang)* yang akan diadakan pada 10-11 Disember 2020 merupakan platform yang sesuai untuk menonjolkan keistimewaan Pulau Pinang dan menarik pelancong perubatan domestik;
 - (ii) Untuk pasaran antarabangsa, promosi diteruskan melalui pameran maya (*virtual*) seperti di program-program *WHOLE 2020* dan *Guiyang Belt & Road Exhibition* bagi menghubungkan pasaran pelancongan perubatan domestik dan antarabangsa tanpa perlu melawat ke negara asing secara fizikal. Pameran ini juga akan membina minat

pelancong perubatan yang berpotensi untuk melawat Pulau Pinang selepas sempadan negara dibuka kepada pelancong asing dan memastikan kesinambungan untuk pembangunan 'branding' Pulau Pinang;

- (iii) Menilai dan mengenal pasti laluan penerbangan antarabangsa (*international air connectivity*) yang kurang terkesan dengan kawalan kemasukan warga asing dan berpotensi untuk membangunkan pelancongan perubatan Pulau Pinang. Selepas Perintah Kawalan Pergerakan Pemulihan (PKPP) ditarik balik, Kerajaan Negeri akan menggandakan aktiviti promosi dan pemasaran kepada bandar-bandar yang dibenarkan masuk dan mempunyai laluan penerbangan terus ke Pulau Pinang; dan
- (iv) Memberi keyakinan kepada pelancong perubatan bahawa Pulau Pinang merupakan destinasi yang selamat. Kerajaan Negeri telah mewujudkan Sistem Akreditasi bagi Kesiapsiagaan COVID-19 di Pulau Pinang (*COVID-19 Safety Accreditation Programme*) yang memberikan pengiktirafan kepada penggiat-penggiat industri pelancongan yang telah memenuhi dan mematuhi garis panduan dan prosedur operasi standard (SOP) kebersihan dan keselamatan yang ditetapkan. Logo akreditasi yang dipamerkan di premis hotel dan tempat tarikan pelancong akan memberi keyakinan dan keamanan yang tinggi kepada pelancong semasa lawatan mereka di Pulau Pinang. Kerajaan Negeri juga memperkenalkan kempen Pelancongan Bertanggungjawab (*Responsible Tourism*) untuk memastikan semua orang sedar tentang tanggungjawab yang dipikul dan harus dijalankan oleh setiap lapisan masyarakat. Video-video pelancongan bertajuk *Your Safety Is Our Priority, Thank You For Keeping Penang Safe* dan *Penang Responsible Tourism* telah dihasilkan bagi menunjukkan usaha-usaha yang dilaksanakan dalam memastikan Pulau Pinang sebagai sebuah destinasi pelancongan yang selamat.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)2

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

2. Apakah rancangan Kerajaan Negeri untuk mencipta peluang pekerjaan terutamanya untuk golongan yang hilang pekerjaan akibat pandemik COVID-19?

**YB. PROF. DR. P. RAMASAMY A/L PALANISAMY
MENJAWAB BAGI PIHAK Y.A.B. KETUA MENTERI**

2. Kerajaan Negeri Pulau Pinang menerusi Pusat Bantuan Kerjaya dan Bakat Pulau Pinang (*Penang Career Assistance and Talent (CAT) Centre*) telah melaksanakan inisiatif-inisiatif untuk membantu rakyat Pulau Pinang yang kehilangan kerja disebabkan oleh pandemik COVID-19 seperti berikut:
 - (i) Menjalankan pemadanan kerja secara berkumpulan (*group job matching*) untuk membantu pencari kerja dengan menjalankan pemadanan jawatan bersesuaian apabila menerima permintaan dari majikan/syarikat. Pusat CAT akan mendapatkan maklumat tentang jenis pekerjaan untuk syarikat yang mengalami penutupan. Susulan itu, Pusat CAT akan menjalankan prosedur pemadanan kerja secara berkumpulan dengan syarikat yang perluaskan operasi;
 - (ii) Laman sesawang Pusat CAT menjadi satu titik tumpuan kepada majikan dan juga pencari kerja. Melalui perkhidmatan percuma laman sesawang Pusat CAT ini, pihak majikan dapat mempromosi peluang pekerjaan yang ditawarkan manakala pencari kerja juga dapat memohon pekerjaan yang ditawarkan menerusi laman sesawang tersebut;

- (iii) Jangkauan kepada agensi-agensi pekerjaan lain secara proaktif bagi memahami peluang-peluang pekerjaan yang aktif untuk dipanjangkan kepada pencari kerja melalui laman sesawang serta *Facebook* Pusat CAT;
- (iv) Bekerjasama dengan Pertubuhan Keselamatan Sosial (PERKESO) dalam membantu pencari kerja melalui program-program seperti latihan, kaunseling, insentif kewangan dan lain-lain; dan
- (v) Bekerjasama dengan agensi-agensi lain untuk mempromosikan maklumat tentang peluang pekerjaan yang tersedia seperti dengan Pihak Berkuasa Pelaksanaan Koridor Utara (NCIA) bagi program JomKerja dan JomNiaga di bawah Pelan Jana Semula Ekonomi Negara (PENJANA) dan TalentCorp untuk program *Career Comeback*.

Selain itu, Kerajaan Negeri turut bekerjasama dengan agensi-agensi lain melalui InvestPenang untuk meneruskan usaha mempromosi dan menarik pelaburan, sama ada pelabur baharu ataupun penambahan pelaburan dari pelabur sedia ada, di samping membantu pembangunan industri kecil dan sederhana (IKS) tempatan. Usaha ini akan mewujudkan lebih banyak peluang pekerjaan di Pulau Pinang dan memberi manfaat kepada pencari kerja. Dari Januari 2019 hingga Mac 2020, Pulau Pinang mencatatkan nilai pelaburan pembuatan yang diluluskan sebanyak RM23.95 bilion dengan anggaran sejumlah 22,921 peluang pekerjaan yang akan tercipta dalam tempoh tiga (3) hingga lima (5) tahun akan datang.

Sebagai tambahan, Kerajaan Negeri juga turut melaksanakan program-program bantuan bagi menggalakkan keusahawanan di kalangan rakyat Pulau Pinang khususnya kepada pencari kerja. Antara program-program yang dilaksanakan adalah seperti berikut:

- (i) Skim Pinjaman Harapan (SPH)

Kerajaan Negeri melalui Perbadanan Pembangunan Pulau Pinang (PDC) telah melaksanakan Skim Pinjaman Harapan (SPH) bermula 2009 sehingga kini. Sehingga September 2020, seramai 3,601

usahawan/penerima bantuan pembiayaan mikro kredit yang telah diluluskan dengan jumlah pinjaman sebanyak RM19.83 juta telah disalurkan.

(ii) Tabung Usahawan Tani (TUT) Negeri Pulau Pinang

Kerajaan Negeri telah memperkenalkan Tabung Usahawan Tani (TUT) Negeri Pulau Pinang yang sebelum ini dikenali sebagai Tabung Usahawan Tani Muda (TUTM). TUT memberi dorongan kepada golongan belia termasuk para graduan untuk menjadikan sektor industri asas tani sebagai kerjaya dan berpotensi sebagai punca pendapatan yang lumayan. Sehingga September 2020, sebanyak RM863,000 telah diagihkan kepada 156 orang usahawan untuk menikmati kemudahan kredit ini.

(iii) Program Peningkatan dan Pemulihan Ekonomi (Bantuan Peralatan)

Program ini adalah untuk peniaga kecil sepenuh masa yang menjalankan perniagaan sekurang-kurangnya satu (1) tahun dan berpendapatan RM3,000.00 sebulan. Bantuan ini diberikan untuk mengembangkan perniagaan sedia ada bagi memperolehi hasil yang lebih lumayan.

**MESYUARAT KEDUA PENGKAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)3

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

3. Adakah Kerajaan Negeri bersedia untuk memberi sokongan penuh kepada industri seni persembahan atau *performing arts*? Industri ini adalah sebuah industri besar di negara-negara seperti United Kingdom, United States dan Singapura.

**YB. YEOH SOON HIN
MENJAWAB BAGI PIHAK Y.A.B. KETUA MENTERI**

3. Kerajaan Negeri telahpun memberi sokongan penuh kepada industri seni persembahan atau *performing arts* melalui inisiatif-inisiatif seperti berikut:
- (i) Meneruskan penganjuran program-program seni persembahan yang menjadi ikon dan simbolik kepada Pulau Pinang sebagai platform untuk komuniti seni berkumpul dan berkongsi pengalaman. Kerajaan Negeri telah menganjurkan program *George Town Festival* dan *George Town Heritage Celebrations* sejak tahun 2010 yang menyediakan platform antarabangsa kepada bakat dan artis tempatan untuk bergiat dalam seni persembahan;
 - (ii) Mewujudkan generasi pelapis bagi mewarisi seni persembahan di Pulau Pinang. Kerajaan Negeri menggalakkan penglibatan pelajar-pelajar sekolah dalam seni warisan dan kebudayaan melalui jemputan persembahan dalam majlis rasmi Kerajaan seperti Majlis Jamuan Teh Sempena Hari Keputeraan TYT, Majlis Sambutan Hari Raya dan majlis lawatan delegasi luar negara

ke Pulau Pinang. Platform ini memberikan peluang kepada pelajar-pelajar sekolah menunjukkan bakat dan membolehkan seni persembahan warisan dan kebudayaan diturunkan kepada generasi akan datang. Program-program *Penang Celebrates* pada tahun lepas turut melibatkan pelajar-pelajar sekolah dengan tujuan memupuk minat serta mencungkil bakat baharu;

- (iii) Berikutan segala aktiviti dan program tidak dapat dianjurkan secara perhimpunan pada masa penularan wabak Covid-19, Program Pemerkasaan Sektor Kesenian Pulau Pinang (*Show Penang*) juga dilaksanakan untuk menggalakkan kumpulan kesenian/artis individu untuk menganjurkan aktiviti dan program kesenian secara atas talian (*online*). Peruntukan sebanyak RM200,000.00 telah disediakan bagi program ini dengan maksimum RM3,000.00 bagi setiap satu permohonan;
- (iv) Pihak Kerajaan Negeri Pulau Pinang juga telah meneruskan penganjuran program *George Town Festival 2020* pada 4 - 26 Julai 2020 secara atas talian walaupun program ini asalnya dibatalkan dalam peringkat awal. Pihak Kerajaan Negeri Pulau Pinang membuat keputusan untuk meneruskan penganjuran program kerana program ini adalah salah satu program kesenian yang signifikan dan membawa manfaat kepada industri kesenian persembahan Pulau Pinang. Program kesenian persembahan atas talian yang disediakan dalam *George Town Festival 2020* termasuk muzik klasik kaum India, tarian tradisi kaum Melayu, persembahan nyanyian lagu kampung, Opera Teochew dan sebagainya telah membawa rezeki, peluang pekerjaan serta peluang persembahan bakat tempatan kepada industri kesenian persembahan Pulau Pinang semasa pandemik wabak Covid-19 ini;
- (v) Melalui Skim Peka 2.0, pihak Kerajaan Negeri Pulau Pinang juga menyediakan bantuan kewangan kepada pihak operator tempat persembahan kesenian untuk meminjam wang

dengan pihak Penang Development Corporation (PDC) secara 0% interest;

- (vi) Menggalakkan persatuan dan organisasi kesenian menganjurkan program kesenian di Pulau Pinang. Antaranya Kerajaan Negeri turut memberi bantuan kewangan kepada Performing Arts Centre of Penang (Penangpac) sebagai pusat *performing arts* di Pulau Pinang, Penang House of Music (PHoM), Pertubuhan Tarian Moden Pulau Pinang (Euphoria) yang mempamerkan gaya tarian kontemporari dan juga Penang Philharmonic Orchestra. Kerajaan Negeri juga mengambil inisiatif untuk bekerjasama dengan persatuan Wushu, Lion & Dragon Dance Association Penang bagi mewujudkan *Standard Operating Procedure* (SOP) bagi tarian singa dan naga. SOP tersebut juga telah mendapat perakuan daripada Kementerian Pelancongan, Seni dan Budaya (MOTAC);
- (vii) Menjadikan Pulau Pinang sebagai hab kesenian. Kerajaan Negeri mempunyai rancangan jangka masa panjang untuk membangunkan projek *Penang Art District* sebagai pemangkin dalam bidang kesenian dan kebudayaan. Tapak projek ini terletak di antara Lebuhraya Tun Dr. Lim Chong Eu dan Gat Lebuh Macallum. *Penang Art District* akan menempatkan koleksi terbesar galeri seni, muzium budaya, ruang pameran, studio seni dan muzik, sekolah seni dan bengkel seni di Malaysia. *Penang Art District* akan meningkatkan seni persembahan di Pulau Pinang melalui penglibatan bakat-bakat tempatan, artis, tukang seni, pendidik dan masyarakat umum; dan
- (viii) Kerajaan Negeri Pulau Pinang menubuhkan portfolio Ekonomi Kreatif untuk memperkasa industri seni, budaya dan warisan dengan rancangan dan dasar-dasar ekonomi negeri. Dengan Ekonomi Kreatif ini, industri kesenian persembahan sebagai salah satu tunggak utama industri kesenian berupaya menjadi penjana ekonomi (*economic stimulator*) yang boleh mewujudkan peluang pekerjaan, menarik pelaburan baharu, meningkatkan kualiti kehidupan serta memperkayakan

kemudahan tempatan. Ekonomi Kreatif ingin memberi definisi dan perspektif baharu kepada sektor kesenian bahawa bidang kesenian dan kreativiti tidak harus dianggap sebagai sejenis hobi sahaja tetapi sesuatu yang boleh mendatangkan rezeki dan menyumbang kepada *gross domestic product* (GDP) Pulau Pinang. Ini termasuklah seni persembahan seperti tarian, nyanyian dan sebagainya.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)4

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

4. Apakah inisiatif Kerajaan Negeri untuk menolong golongan penjaja selain bantuan kewangan?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

4. Pihak Berkuasa Tempatan (PBT) di Pulau Pinang sentiasa prihatin terhadap nasib penjaja dan peniaga kecil yang berniaga secara kecil-kecilan bagi menampung kos sara hidup. Sehubungan itu, Kerajaan Negeri melalui kedua-dua PBT di Pulau Pinang telah melaksanakan beberapa inisiatif bagi membantu golongan penjaja seperti berikut:
- (i) Memperkenalkan inisiatif jualan makanan secara dalam talian seperti yang dilaksanakan oleh pihak Majlis Bandaraya Pulau Pinang (MBPP) iaitu penyediaan platform Jom Beli Online @ MBPP (JBO@MBPP) dengan kerjasama ejen pengantar makanan, *DeliverEat* bagi membantu penjaja meningkatkan jualan;
 - (ii) Pelaksanaan portal e-Bazar Ramadan oleh pihak Majlis Bandaraya Seberang Perai (MBSP) bagi membantu peniaga meluaskan perniagaan secara dalam talian. Melalui portal berkenaan, penjaja di Seberang Perai yang mempunyai akaun laman sosial akan didaftarkan dan produk jualan mereka akan dimasukkan ke dalam e-Katalog Bazar Ramadan bagi membolehkan pengguna membuat pilihan menerusi katalog tersebut;

- (iii) Pengecualian sewa gerai untuk bulan April hingga Julai 2020 bagi meringankan beban penjaja yang terjejas semasa penguatkuasaan Perintah Kawalan Pergerakan (PKP);
- (iv) Menjalinkan kerjasama dengan Bank Negara Malaysia dan penyedia perkhidmatan kewangan (FSP) untuk membantu peniaga melalui transaksi tanpa tunai;
- (v) Mewujudkan Garis Panduan seperti Garis Panduan Kaedah Penjajaan Secara Mudah Alih dan Garis Panduan Trak Makanan dan Trak Perkhidmatan yang boleh diakses melalui laman web sebagai panduan kepada penjaja dan peniaga kecil dalam menjalankan perniagaan;
- (vi) Memberikan keutamaan kepada penjaja-penjaja di tepi jalan untuk mengisi kekosongan ruang niaga milik PBT melalui sesi temuduga ruang niaga yang diadakan pada setiap bulan;
- (vii) Memberi taklimat dan sesi konsultasi kepada penjaja-penjaja di tapak;
- (viii) Memudahkan pengeluaran lesen atau permit penjaja sementara atau peniaga kecil yang menjalankan perniagaan di lokasi yang bersesuaian dan tidak menimbulkan kacau ganggu serta mematuhi Garis Panduan Kaedah Penjajaan Secara Mudah Alih;
- (ix) Menyediakan lebih banyak lokasi untuk berniaga dengan menjalankan kerja-kerja naik taraf kompleks makanan serta membina baharu kompleks pasar dan makanan seperti di Batu Feringgi dan Teluk Kumbar;
- (x) Mengadakan Program Mesra Pelanggan yang dikenali "Santai Peniaga" bagi membantu peniaga-peniaga untuk menukarkan konsep / bentuk perniagaan kepada trak makanan dengan menyelaras perjumpaan peniaga-peniaga bersama agensi kewangan berkaitan dan penyedia trak makanan; dan

- (xi) Menyediakan lokasi-lokasi penempatan semula penjaja ke lokasi yang lebih sesuai seperti yang sedang dilaksanakan di kawasan-kawasan berikut:
- (a) Berhampiran Kayangan Resort, Bertam; dan
 - (b) Berhampiran Taman Alma Jaya

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)5

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

5. Adakah Kerajaan Negeri akan mempertimbangkan penganjuran atau promosi sukan-sukan alternatif seperti MMA atau "*Mixed Martial Arts*" dan sukan-sukan persembahan seperti gusti sebagai cara untuk menarik lebih ramai pelancong ke Pulau Pinang?

**YB. SOON LIP CHEE
MENJAWAB BAGI PIHAK Y.A.B. KETUA MENTERI**

5. Pada masa ini masih belum ada penganjuran atau promosi sukan-sukan alternatif seperti *Mixed Martial Arts* (MMA) dan sukan-sukan persembahan seperti gusti dilaksanakan di peringkat kerajaan negeri. Walau bagaimanapun, Kerajaan Negeri melalui Jawatankuasa Majlis Mesyuarat Kerajaan (MMK) Belia dan Sukan dan Majlis Sukan Negeri Pulau Pinang (MSNPP) sentiasa terbuka untuk bekerjasama dengan mana-mana pihak yang berminat untuk menganjurkan sukan-sukan alternatif tersebut sebagai cara untuk menarik lebih ramai pelancong ke Pulau Pinang.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)6

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

6. Apakah inisiatif terbaru Kerajaan Negeri untuk memperkasakan kemudahan bagi komuniti OKU?

**YB. PHEE BOON POH
MENJAWAB BAGI PIHAK Y.A.B. KETUA MENTERI**

6. Kerajaan Negeri komited dalam menjaga kebajikan golongan yang mudah terkesan (*vulnerable groups*) seperti komuniti orang kurang upaya (OKU). Melalui inisiatif strategik visi Penang2030 iaitu "*Uplift vulnerable communities and reduce inequalities*" , Kerajaan Negeri bercadang untuk melaksanakan beberapa inisiatif baru khusus untuk golongan OKU. Cadangan tersebut termasuklah:-
- (a) Menjalinkan kerjasama dengan pihak swasta seperti syarikat-syarikat korporat untuk mewujudkan peluang pekerjaan yang sesuai untuk golongan OKU di samping meningkatkan lagi kerjasama yang sudah terjalin antara Kerajaan Negeri dan pertubuhan bukan kerajaan (NGO) OKU; dan
 - (b) Memperhalusi rancangan bantuan kewangan untuk golongan OKU yang bekerja sama ada untuk mewujudkan Elaun Pekerja Cacat (EPC) di bawah peruntukan Kerajaan Negeri atau menambah nilai pembayaran EPC yang disalurkan Kerajaan Persekutuan.

Kerajaan Negeri kekal dengan pendirian untuk mewujudkan kemudahan dengan aksesibiliti tanpa sempadan (*barrier-free accessibility*) kepada semua golongan termasuk komuniti OKU. Komitmen ini mestilah boleh dilaksanakan (*implementable*) dalam memenuhi *Sustainable Development Goal 10* iaitu mengurangkan ketidaksamaan dalam pendapatan, jantina, ketidakupayaan, kaum, etnik, asal usul, agama atau status ekonomi.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)7

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

7. Apakah langkah-langkah kerjasama dengan NGO bagi menjadikan Pulau Pinang sebuah negeri yang prihatin terhadap masyarakat OKU?

**YB. PHEE BOON POH
MENJAWAB BAGI PIHAK Y.A.B. KETUA MENTERI**

7. Seiring dengan aspirasi Penang2030 di bawah tema *Empower people to strengthen civic participation*, Kerajaan Negeri sentiasa menjalinkan kerjasama erat antara badan-badan kerajaan dan juga pertubuhan bukan kerajaan (NGO) dalam menjadikan Pulau Pinang sebuah negeri yang prihatin terhadap komuniti orang kurang upaya (OKU). Antara langkah-langkah Kerajaan Negeri dalam usaha ini adalah:-
- (i) Mengawal standard perkhidmatan pusat-pusat jagaan OKU dengan mengeluarkan Perakuan Pendaftaran selaras dengan peruntukan Akta Pusat Jagaan 1993. Kawalan yang merangkumi perihal pendaftaran, pengawalan dan pemeriksaan ini dilaksanakan oleh Jabatan Kebajikan Masyarakat (JKM) demi menjamin kebajikan penghuni pusat jagaan berada pada tahap yang terbaik;
 - (ii) Meningkatkan kemahiran kerja sosial terhadap sukarelawan-sukarelawan daripada NGO yang mengendalikan kebajikan OKU melalui penganjuran Sesi Promosi dan Pengenalan Kerja Sosial serta Kursus Persijilan Kemahiran Malaysia Sektor Penjagaan dan Perkhidmatan Komuniti;

- (iii) Bekerjasama dengan NGO di Pulau Pinang dalam membantu OKU yang mempunyai keupayaan yang sesuai untuk mendapatkan pekerjaan melalui program *Job Coach* dan *Disability Equality Training*;
- (iv) Meningkatkan keprihatinan dan rasa tanggungjawab masyarakat setempat terhadap nasib dan kebajikan golongan OKU melalui Program Pemulihan Dalam Komuniti (PDK). Program ini dijalankan di 25 Pertubuhan Pemulihan Dalam Komuniti (PDK) sekitar negeri Pulau Pinang;
- (v) Bekerjasama dengan NGO dalam memberikan perkhidmatan untuk golongan OKU dengan kecacatan khusus. Sebagai contoh, kerjasama antara JKM dengan Persatuan Orang Pekak Pulau Pinang dalam mendapatkan jurubahasa bagi membantu OKU pekak bisu;
- (vi) Memberikan sumbangan bantuan kewangan RM500 secara *one-off* kepada pertubuhan atau persatuan yang berdaftar dengan Jabatan Pendaftaran Pertubuhan Malaysia (ROS) negeri Pulau Pinang di bawah Pakej Bantuan Rakyat Negeri Pulau Pinang 2.1. Bantuan ini diperuntukkan kepada 3,996 pertubuhan atau persatuan termasuk pertubuhan yang dikhususkan untuk penjagaan dan kebajikan OKU; dan
- (vii) Kerajaan Negeri juga dalam usaha untuk mewujudkan Bantuan Geran Pentadbiran kepada Pertubuhan Sukarela Kebajikan (PSK) di bawah peruntukan negeri. Sumbangan kewangan yang merangkumi bantuan bayaran sewa premis, kos utiliti dan pembiayaan penganjuran program kebajikan ini akan disalurkan melalui JKM kepada NGO-NGO yang menjalankan aktiviti-aktiviti kebajikan kepada golongan sasaran termasuk kelompok OKU.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)8

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

8. Adakah ada pelan-pelan ekonomi untuk komuniti OKU untuk mereka meneruskan hidup khususnya di negeri ini ketika keadaan ekonomi negara yang tidak stabil akibat pandemik?

**YB. PHEE BOON POH
MENJAWAB BAGI PIHAK Y.A.B. KETUA MENTERI**

8. Kerajaan Negeri sentiasa prihatin terhadap nasib rakyat Negeri Pulau Pinang terutama kepada golongan yang mudah terkesan akibat pandemik COVID-19 seperti golongan miskin dan komuniti orang kurang upaya (OKU). Pada masa ini, Kerajaan Negeri tidak mempunyai pelan ekonomi yang khusus untuk golongan OKU tetapi Kerajaan Negeri memfokuskan kepada pemantapan program-program sedia ada untuk memperkasakan dan membina daya saing komuniti OKU. Antara program yang dilaksanakan oleh Kerajaan Negeri bagi membantu golongan OKU ini adalah:-
- (i) Program *2-Year Exit Programme* yang dijalankan oleh Jabatan Kebajikan Masyarakat (JKM). Program berkonsepkan kebajikan produktif ini bertujuan untuk melatih dan membina daya upaya klien agar dapat keluar dari kepompong kemiskinan;
 - (ii) Program *Job Coaching* dan *Disability Equality Training* iaitu program kerjasama antara JKM dengan agensi-agensi lain seperti Jabatan Tenaga Kerja, Jabatan Kesihatan Negeri dan majikan-majikan yang berpotensi untuk mengambil OKU sebagai tenaga kerja;

- (iii) Karnival Kerjaya OKU anjuran JKM yang diadakan bagi memudahkan individu OKU yang mencari pekerjaan untuk mendapatkan hebahan dan peluang pekerjaan yang ditawarkan bakal majikan yang turut serta dalam karnival tersebut;
- (iv) Program Pemulihan dan Peningkatan Ekonomi atau lebih dikenali sebagai Bantuan Peralatan. Program ini bertujuan untuk membantu pengusaha-pengusaha perniagaan meningkatkan pendapatan melalui sumbangan peralatan yang mampu menambah kapasiti pengeluaran produk perniagaan;
- (v) Program Pembangunan Modal Insan iaitu program yang dilaksanakan oleh Pejabat Daerah dan Tanah bagi melatih peserta kursus kepada pembangunan kemahiran seperti masakan atau jahitan. Golongan OKU boleh memanfaatkan kursus ini untuk menambah pendapatan sama ada melalui perniagaan sendiri atau bekerja;
- (vi) Program Pemulihan Dalam Komuniti (PDK) iaitu sebuah program yang dirangka untuk melatih golongan OKU dengan kemahiran-kemahiran perniagaan industri kecil dan sederhana. Program yang dijalankan ini adalah hasil kerjasama antara 25 Pertubuhan Pemulihan Dalam Komuniti (PDK) di sekitar Negeri Pulau Pinang;
- (vii) Bantuan kewangan bulanan yang dilaksanakan oleh JKM. Bantuan ini merangkumi Bantuan OKU Tidak Berupaya Bekerja, Bantuan Penjagaan OKU Terlantar dan Elaun Pekerja Cacat untuk golongan OKU yang mempunyai pekerjaan; dan
- (viii) Program Bantuan OKU iaitu sebuah bantuan kewangan di bawah i-Sejahtera yang disalurkan kepada penerima sumbangan setiap tahun. Kerajaan Negeri telah menaikkan amaun sumbangan daripada RM130.00 kepada RM150.00 bermula tahun 2020 bagi meringankan beban kewangan yang dihadapi oleh golongan OKU.

Kerajaan Negeri juga menyediakan sumbangan *one-off* kepada golongan OKU menerusi Pakej Bantuan Rakyat Pulau Pinang 1.0 dan 2.0 bagi membantu golongan yang terkesan dengan penularan wabak COVID-19. Antara sumbangan *one-off* yang disalurkan adalah:-

- (i) Bantuan *one-off* RM500.00 kepada peniaga dan penjaja termasuk dalam kalangan OKU;
- (ii) Bantuan *one-off* RM500.00 kepada penerima bantuan JKM yang turut merangkumi Bantuan Penjagaan OKU Terlantar, Bantuan OKU Tidak Berupaya Bekerja dan Elaun Pekerja Cacat;
- (iii) Pengecualian sewa selama empat (4) bulan bagi penghuni Program Perumahan Rakyat (PPR) di bawah Kerajaan Negeri termasuk penghuni berstatus OKU;
- (iv) Pengecualian bayaran sewa selama sebulan turut diberikan kepada mana-mana OKU yang menyewa premis-premis perniagaan milik Pihak Berkuasa Tempatan (PBT); dan
- (v) Penangguhan tempoh bayaran balik selama tiga (3) bulan bagi peminjam OKU yang membuat pinjaman di bawah Skim Pinjaman Harapan, Tabung Usahawan Tani, dan Pinjaman Penuntut.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)9

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

9. Dalam sektor kemahiran industri, adakah Kerajaan Negeri menyediakan tenaga pengajar yang mencukupi dari golongan OKU untuk berkongsi kemahiran seperti kraf tangan, seni dan pembuatan?

**YB. PHEE BOON POH
MENJAWAB BAGI PIHAK Y.A.B. KETUA MENTERI**

9. Kerajaan Negeri sentiasa komited dalam meningkatkan daya saing golongan orang kurang upaya (OKU) agar mereka dapat menyumbang ke dalam pembangunan komuniti dan ekonomi negeri seperti orang upaya yang lain. Selaras dengan salah satu inisiatif strategik Penang2030 iaitu *Uplift Vulnerable Communities and Reduce Inequalities*, Kerajaan Negeri memfokuskan dalam menyediakan program - program latihan dan kursus keusahawanan kepada golongan OKU. Kebanyakan program yang disediakan ini merupakan kursus jahitan, bakeri dan masakan melalui penglibatan golongan OKU dalam Program Pemulihan Dalam Komuniti (PDK), Program Pembangunan Modal Insan yang dianjurkan oleh Pejabat Daerah dan Tanah serta Program *Job Coaching* yang dianjurkan oleh Jabatan Kebajikan Masyarakat (JKM). Program *Star@U* anjuran Institut Kemahiran Tinggi Belia juga menyediakan kursus kemahiran yang boleh disertai oleh OKU mengikut kesesuaian fizikal peserta.

Pada masa ini, Kerajaan Negeri tidak mempunyai tenaga pengajar dalam kalangan OKU bagi sektor industri kemahiran kerana peserta OKU yang terlibat dengan program - program kemahiran yang

dianjurkan masih berstatus peserta. Namun, JKM mempunyai kerja sama dengan Persatuan Sukan dan Rekreasi Orang Kurang Upaya Pulau Pinang (PESRON) bagi mendapatkan jurulatih - jurulatih OKU untuk melahirkan atlet paralimpik.

Alternatifnya, terdapat beberapa program yang dijalankan pihak swasta yang melatih golongan OKU dalam industri kreatif seperti seni dan kraf tangan. Sebagai contoh, Eden Handicap Service Centre Berhad menyediakan latihan kepada OKU bagi membantu mereka berdikari dan membuka perniagaan sendiri termasuklah penjualan barangan kraf tangan dan perkhidmatan kursus latihan.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)10

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

10. Apakah jaminan Kerajaan Negeri kepada komuniti Orang Kurang Upaya (OKU) supaya mereka dapat hidup dalam persekitaran sosial yang selesa dan kondusif?

**YB. PHEE BOON POH
MENJAWAB BAGI PIHAK Y.A.B. KETUA MENTERI**

10. Kerajaan Negeri sentiasa prihatin terhadap keperluan kelompok-kelompok masyarakat yang rentan (*vulnerable*) terutama golongan Orang Kurang Upaya (OKU). Keprihatinan ini dibuktikan lagi melalui agenda inisiatif strategik *uplift vulnerable communities and reduce inequalities* di bawah salah satu tema Penang2030 iaitu *empower people to strengthen civic participation*. Dalam memastikan komuniti OKU dapat menjalani kehidupan dalam persekitaran yang selesa dan kondusif, Kerajaan Negeri telah melaksanakan pelbagai inisiatif dari sudut infrastruktur serta pembangunan dan sumbangan sosial iaitu:
- (i) Memberi keutamaan perkhidmatan di fasiliti-fasiliti kesihatan dengan mewujudkan kaunter khas *Rapid Lane (R-lane)* yang bertujuan memendekkan masa menunggu untuk berjumpa pakar kesihatan dan masa menunggu untuk mengambil ubat-ubatan di Bahagian Farmasi. Pemegang kad OKU akan diberikan keutamaan dalam menggunakan *R-lane* ini;
 - (ii) Menyediakan kemudahan-kemudahan khas dan mesra OKU di lokasi-lokasi strategik serta fasiliti guna sama seperti penyediaan laluan alternatif (*ramp*) dan

kemudahan lif mesra OKU. Perkara ini juga merangkumi laman web atau portal agensi yang mesra OKU;

- (iii) Menyediakan kemudahan pengecualian caj seperti caj pendaftaran, caj temu janji dan caj ubat-ubatan di Unit Pesakit Luar. Golongan OKU juga layak mendapat pengecualian bayaran wad kelas 3 bagi OKU di bawah jagaan kerajaan berdasarkan pengecualian bayaran di bawah perenggan 16(3) Perintah Fi (Perubatan) 1982;
- (iv) Mengecualikan pembayaran tempat letak kenderaan kepada golongan OKU yang menggunakan khidmat letak kenderaan milik Pihak Berkuasa Tempatan (PBT). Perkhidmatan parkir percuma ini boleh didapati melalui aplikasi *Penang Smart Parking*;
- (v) Menyediakan kemudahan pengangkutan awam yang mesra OKU termasuklah kemudahan infrastruktur seperti tanjakan untuk OKU berkerusi roda di stesen bas dan kereta api serta perkhidmatan mesra OKU seperti diskaun harga tambang dan Kad Rapid Emas;
- (vi) Menaik taraf fasiliti sedia ada milik Pihak Berkuasa Tempatan (PBT) untuk menggabungkan elemen reka bentuk sejagat (*universal design*) dalam fasiliti yang telah disediakan seperti dewan orang ramai milik Majlis Bandaraya Seberang Perai (MBSP) dan tandas awam di Dewan Lebuh Cecil milik Majlis Bandaraya Pulau Pinang (MBPP);
- (vii) Menyediakan bantuan kewangan secara bulanan kepada golongan OKU. Bantuan ini merangkumi Bantuan OKU Tidak Berupaya Bekerja (BTB), Bantuan Pesakit/OKU Terlanta (BPT) dan Elaun Pekerja Cacat (EPC). Bantuan ini disalurkan oleh Jabatan Kebajikan Masyarakat (JKM);
- (viii) Menyediakan bantuan kewangan RM150 yang dibayar sekali setiap tahun melalui Program Bantuan Orang Kurang Upaya di bawah program-program kebajikan i-Sejahtera;
- (ix) Memberi sumbangan RM1,000 kepada waris individu OKU yang menerima Program Bantuan OKU di bawah

i-Sejahtera melalui Program Penghargaan Sumbangan secara *one-off* yang dapat meringankan beban waris individu OKU sekiranya berlaku kemalangan jiwa kepada individu OKU tersebut;

- (x) Menjalankan program *Job Coaching* dan *Disability Equality Training* iaitu program kerjasama antara JKM dengan agensi-agensi lain seperti Jabatan Tenaga Kerja Semenanjung Malaysia (JKSM), Jabatan Kesihatan Negeri dan majikan-majikan yang berpotensi untuk mengambil OKU sebagai tenaga kerja;
- (xi) Menganjurkan Karnival Kerjaya OKU dengan kerjasama JKM bagi membantu golongan OKU mendapatkan hebahan dan peluang pekerjaan yang ditawarkan bakal majikan yang turut serta dalam karnival tersebut;
- (xii) Menyediakan perkhidmatan jurubahasa bagi OKU pekak bisu melalui kerjasama antara JKM dengan Persatuan Orang Pekak Pulau Pinang;
- (xiii) Menyediakan khidmat kaunseling kepada golongan OKU bagi membantu mereka memahami diri dan kekal terlibat dalam kelompok orang upaya. Kaunseling tersebut akan disampaikan oleh kaunselor bertauliah JKM;
- (xiv) Bekerjasama dengan JKM dalam memadankan tempat perlindungan yang sesuai bagi golongan OKU dengan pertubuhan-pertubuhan bukan kerajaan (NGO) yang sesuai; dan
- (xv) Bagi OKU beragama Islam dengan kecacatan tertentu, mereka boleh dikecualikan daripada mengikuti Kursus Pra-perkahwinan Islam seperti yang diwajibkan kepada golongan orang upaya.

Manakala, inisiatif Kerajaan Negeri pada peringkat dasar pula adalah:-

- (i) Memastikan golongan OKU mendapat hak-hak kesetaraan asas seperti golongan orang upaya selaras dengan Akta Orang Kurang Upaya 2008 (Akta 685);

- (ii) Menubuhkan Jawatankuasa *Universal Design* di peringkat PBT untuk membincangkan secara terperinci isu dan cabaran berkaitan elemen reka bentuk sejagat (*universal design*);
- (iii) Menggalakkan penyertaan OKU dalam Program *2-Year Exit Programme* yang dijalankan oleh Jabatan Kebajikan Masyarakat (JKM). Program berkonsepkan kebajikan produktif tersebut bertujuan untuk melatih dan membina daya upaya klien agar dapat keluar dari kepompong kemiskinan;
- (iv) Menggalakkan penyertaan golongan OKU dalam perkhidmatan awam selaras dengan Pekeliling Perkhidmatan Bil. 16/2010 Pencapaian Dasar Satu Peratus Pekerjaan Dalam Perkhidmatan Awam Kepada Orang Kurang Upaya;
- (v) Menyokong inisiatif-inisiatif agensi Kerajaan Negeri yang memudahkan golongan OKU untuk berurusan dengan kerajaan seperti kemudahan tandas dan parkir khas OKU, laluan khas untuk OKU serta portal laman web mesra OKU;
- (vi) Mensyaratkan penyediaan kemudahan OKU dalam setiap permohonan Kebenaran Merancang dan permohonan Kelulusan Pelan Bangunan;
- (vii) Meningkatkan keprihatinan dan rasa tanggungjawab masyarakat setempat terhadap nasib dan kebajikan golongan OKU melalui Program Pemulihan Dalam Komuniti (PDK) yang dianjurkan JKM. Program yang bersifat serampang dua mata ini juga turut bertujuan untuk memajukan industri kecil dan sederhana setempat; dan
- (viii) Menggalakkan penglibatan komuniti dan sukarelawan dalam menjaga kebajikan OKU seperti kerjasama antara JKM dengan para sukarelawan Program *Help Home*. Melalui program ini, sukarelawan akan membantu dalam penjagaan OKU yang hidup di rumah dalam keadaan daif.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)11

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

11. Adakah pihak kerajaan mempunyai perancangan untuk mewujudkan industri persembahan seni (*performing arts*) bagi golongan muda di negeri ini?

**YB. YEOH SOON HIN
MENJAWAB BAGI PIHAK Y.A.B. KETUA MENTERI**

11. Kerajaan Negeri mempunyai perancangan untuk mewujudkan industri persembahan seni (*performing arts*) bagi golongan muda di Pulau Pinang melalui inisiatif-inisiatif seperti berikut:
- (i) Mewujudkan generasi pelapis yang terdiri daripada golongan muda bagi mewarisi seni persembahan di Pulau Pinang. Kerajaan Negeri menggalakkan penglibatan pelajar-pelajar sekolah dalam seni warisan dan kebudayaan melalui jemputan persembahan dalam majlis rasmi kerajaan seperti Majlis Jamuan Teh Sempena Hari Keputeraan TYT, Majlis Sambutan Hari Raya dan majlis lawatan delegasi luar negara ke Pulau Pinang. Platform ini memberikan peluang kepada pelajar-pelajar sekolah menunjukkan bakat dan membolehkan seni persembahan warisan dan kebudayaan diturunkan kepada generasi muda. Program-program *Penang Celebrates* pada tahun lepas turut melibatkan pelajar-pelajar sekolah dengan tujuan memupuk minat serta mencungkil bakat baru;
 - (ii) Meneruskan penganjuran program-program seni persembahan yang menjadi ikon dan simbolik kepada Pulau

Pinang sebagai platform untuk komuniti seni berkumpul dan berkongsi pengalaman. Kerajaan Negeri telah menganjurkan program *George Town Festival* dan *George Town Heritage Celebrations* sejak tahun 2010 yang menyediakan platform antarabangsa kepada bakat dan artis tempatan khususnya daripada golongan muda untuk bergiat dalam seni persembahan;

- (iii) Menjadikan Pulau Pinang sebagai hab kesenian. Kerajaan Negeri mempunyai rancangan jangka masa panjang untuk membangunkan projek *Penang Art District* sebagai pemangkin dalam bidang kesenian dan kebudayaan. Tapak projek ini terletak di antara Lebuhraya Tun Dr. Lim Chong Eu dan Gat Lebu Macallum. *Penang Art District* akan menempatkan koleksi seni terbesar yang melibatkan galeri seni, muzium budaya, ruang pameran, studio seni dan muzik, sekolah seni dan bengkel seni di Malaysia. *Penang Art District* akan meningkatkan seni persembahan di Pulau Pinang melalui penglibatan bakat-bakat tempatan, artis, tukang seni, pendidik dan masyarakat umum; dan
- (iv) Melaksanakan Program Pemerksaan Sektor Kesenian Pulau Pinang (*Show Penang*) untuk menggalakkan kumpulan kesenian/artis individu termasuk golongan muda untuk menganjurkan aktiviti dan program kesenian secara atas talian (*online*), memandangkan segala aktiviti dan program tidak dapat dianjurkan secara perhimpunan pada masa penularan Wabak COVID-19. Peruntukan sebanyak RM200,000 telah disediakan bagi program ini dengan maksimum RM3,000 bagi setiap satu permohonan.
- (v) Kerajaan Negeri Pulau Pinang menubuhkan portfolio Ekonomi Kreatif untuk memperkasa industri seni, budaya dan warisan dengan rancangan dan dasar-dasar ekonomi negeri. Dengan Ekonomi Kreatif ini, industri kesenian persembahan sebagai salah satu tunggak utama industri kesenian berupaya menjadi penjana ekonomi (*economic stimulator*) yang boleh mewujudkan peluang pekerjaan, menarik pelaburan baru, meningkatkan kualiti kehidupan serta memperkayakan kemudahan tempatan. Ekonomi Kreatif ingin memberi definisi dan perspektif baru kepada sektor kesenian bahawa bidang kesenian dan kreativiti tidak harus dianggap sebagai sejenis hobi sahaja tetapi sesuatu

yang boleh mendatangkan rezeki dan menyumbang kepada GDP Pulau Pinang. Ini termasuklah seni persembahan seperti tarian, nyanyian dan sebagainya.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)12

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

12. Mengapakah kebanyakan persembahan seni semasa acara tahunan ***George Town Festival*** (GTW) dijayakan oleh artis luar dan bukan artis tempatan?

**YB. YEOH SOON HIN
MENJAWAB BAGI PIHAK Y.A.B. KETUA MENTERI**

12. Program *George Town Festival* (GTR) dianjurkan oleh George Town World Heritage Incorporated (GTWHI) bagi mempamerkan kekayaan dan kepelbagaian kesenian, kebudayaan dan warisan melalui persembahan berkelas dunia. Pelaksanaannya adalah melalui kolaborasi dengan artis-artis tempatan dan antarabangsa. Program ini juga bermatlamat untuk memupuk rasa kepunyaan terhadap bandar George Town serta meningkatkan tahap kehidupan penduduk tempatan.

Untuk menyokong pertumbuhan artis serta komuniti seni di Pulau Pinang, YB. Yeoh Soon Hin yang telah mengambil alih portfolio kesenian Majlis Mesyuarat Kerajaan (MMK) telah menetapkan halatuju bahawa artis tempatan mesti diberi peluang.

Justeru, bagi memastikan penglibatan artis-artis tempatan, GTWHI mulai tahun 2019 telah menetapkan bahawa program *George Town Festival* hendaklah mempamerkan minimum 40% program dan persembahan artis tempatan. Ini adalah perbezaan yang telah ditunjukkan berbanding dengan *George Town Festival* sebelum 2019. Senarai penglibatan artis tempatan dan antarabangsa bagi tahun 2019 dan 2020 adalah seperti di **Lampiran A**. Berdasarkan senarai tersebut, sebanyak 64

program persembahan telah dijalankan dalam penganjuran *George Town Festival* pada tahun 2019 dan 2020. Sejumlah 39 program (60.9%) adalah daripada artis-artis tempatan, 24 program (37.5%) adalah terdiri daripada artis-artis antarabangsa dan 1 program (1.6%) merupakan campuran artis tempatan dan antarabangsa. Statistik ini menunjukkan bahawa program *George Town Festival* menekankan penglibatan artis-artis tempatan di samping memberi perhatian kepada artis-artis antarabangsa dalam mempromosikan kepelbagaian seni persembahan.

LAMPIRAN A

**SENARAI ARTIS TEMPATAN DAN ANTARABANGSA YANG TERLIBAT DALAM
PROGRAM GEORGE TOWN FESTIVAL BAGI TAHUN 2019 DAN 2020**

Bil.	Nama Persembahan	Nama Artis	Kategori Tempatan / Antarabangsa
1	When Night Falls (GTF 2019)	Compagnie des Quidams	Antarabangsa
2	When Night Falls (GTF 2019)	Moz Drums	Antarabangsa
3	When Night Falls (GTF 2019)	Teatro Pavana	Antarabangsa
4	When Night Falls (GTF 2019)	FILAMEN	Tempatan
5	Art in the City - Malaysia Inside Out (GTF 2019)	Wak Long Music Group & Art Centre	Tempatan
6	Art in the City - Malaysia Inside Out (GTF 2019)	Chong Yee Chinese Music Academy	Tempatan
7	Art in the City - Malaysia Inside Out (GTF 2019)	BhaavaNarthana Naatyalya	Tempatan
8	Art in the City - Malaysia Inside Out (GTF 2019)	BaiZam Generation	Tempatan
9	Art in the City - Malaysia Inside Out (GTF 2019)	Ombak Potehi	Tempatan
10	Art in the City - Malaysia Inside Out (GTF 2019)	Dhol Alliance	Tempatan
11	Art in the City - Garden Gig (GTF 2019)	Penang Jazz Society	Tempatan
12	Art in the City - Garden Gig (GTF 2019)	92PLAY5	Tempatan
13	Art in the City - Garden Gig (GTF 2019)	UiTM Chamber Choir	Tempatan
14	Art in the City - Garden Gig (GTF 2019)	Sada Borneo	Tempatan
15	Art in the City - Tiny Touts (GTF 2019)	Mr John	Tempatan
16	Art in the City - Tiny Touts (GTF 2019)	Ting A Tong	Antarabangsa
17	Art in the City - Tiny Touts (GTF 2019)	Colour Me Art Atelier & Pexstret Dance Theatre	Tempatan
18	Art in the City - Puppet Stage (GTF 2019)	Teochew Puppet and Opera House	Tempatan
19	Art in the City - Puppet Stage (GTF 2019)	Fusion Wayang Kulit	Tempatan
20	Art in the City - Puppet Stage (GTF 2019)	Flying Balloons Puppet	Antarabangsa
21	Art in the City - Dance @ 74 (GTF 2019)	Artis-artis persembahan tempatan	Tempatan
22	The Extravaganza (GTF 2019)	Angika Fine Arts	Tempatan
23	The Extravaganza (GTF 2019)	Incredible Mallakhamb	Antarabangsa
24	The Extravaganza (GTF 2019)	HANDS Percussion	Tempatan

Bil.	Nama Persembahan	Nama Artis	Kategori Tempatan / Antarabangsa
25	The Extravaganza (GTF 2019)	Pichet Klunchun Dance Company dan WHS	Antarabangsa
26	The Extravaganza (GTF 2019)	Chan Hong Yu	Tempatan
27	The Extravaganza (GTF 2019)	WindRiver Productions	Tempatan
28	The Extravaganza (GTF 2019)	Mi Santa	Antarabangsa
29	The Extravaganza (GTF 2019)	Viva Circus	Tempatan
30	The Extravaganza (GTF 2019)	Linda Vellar	Antarabangsa
31	The Extravaganza (GTF 2019)	Jonathan Goh	Antarabangsa
32	The Extravaganza (GTF 2019)	Kumpulan GENIUS Seni Tari	Tempatan
33	Screaming in Silence (GTF 2019)	Parastoo Theatre Team	Antarabangsa
34	The Strangers (GTF 2019)	Leandro Kees	Antarabangsa
35	Kampong Chempedak (GTF 2019)	The Glowers Drama Group	Antarabangsa
36	Fluorophone (GTF 2019)	Speak Percussion	Antarabangsa
37	Journey of a Baby Butterfly (GTF 2019)	Linda Ang (Hong Jie Jie Workstation)	Tempatan
38	Funny Business with Kavin Jay & Friends (GTF 2019)	Kavin Jay	Tempatan
39	Teater Normcore: Double Bill (GTF 2019)	Ridhwan Saidi	Tempatan
40	Bird (GTF 2019)	WHS	Antarabangsa
41	Bird (GTF 2019)	Pichet Klunchun Dance Company	Antarabangsa
42	Armour and Skin (GTF 2019)	HANDS Percussion	Tempatan
43	Armour and Skin (GTF 2019)	Gamelan Yuganada	Antarabangsa
44	Light - A Staged Reading (GTF 2019)	Thomas Henning	Antarabangsa
45	Light - A Staged Reading (GTF 2019)	TerryandTheCuz	Tempatan
46	THISNORTHAT Runway Presentation (GTF 2019)	Tan Li Chen dan Lin Yu Bo	Antarabangsa
47	Isle to Isle - Glove Puppet Show (GTF 2019)	Taipei Puppet Theater	Antarabangsa
48	Macam Macam Macallum - Cham Cham Fun (GTF 2019)	Yudi Yap	Tempatan
49	Macam Macam Macallum - Cham Cham Fun (GTF 2019)	WVC the Jazz Ensemble	Tempatan
50	Macam Macam Macallum - Off the Chores (GTF 2019)	Sun Son Theatre	Antarabangsa

Bil.	Nama Persembahan	Nama Artis	Kategori Tempatan / Antarabangsa
51	Macam Macam Macallum - Flag of Pearls & A House Filled with Wealth and Prosperity (GTF 2019)	Madam Ooi See Han (Beng Geok Hong Puppet Theatre Troupe)	Tempatan
52	Macam Macam Macallum - Euphoria Penang Modern Dance Ensemble (GTF 2019)	Euphoria	Tempatan
53	Macam Macam Macallum - Culture Shot (GTF 2019)	Culture Shot (LA LA LI LA TAM PONG)	Tempatan
54	Reflections Vol. II (GTF 2019)	Ahli muzik tempatan	Tempatan
55	Boria PEMENANG (GTF 2019)	Persatuan Melayu Pulau Pinang	Tempatan
56	Macam Macam Berapit - Mesama (GTF 2019)	Su e Giù Circus	Antarabangsa
57	Macam Macam Berapit - 231Show - Happy Moments (GTF 2019)	Lee SeokWon (Performer 231)	Antarabangsa
58	Macam Macam Berapit - Celebrating the World (GTF 2019)	Emilio dan Leandro Ponce	Antarabangsa
59	Macam Macam Berapit - Three Scholars in a Family (GTF 2019)	Opera Yong Choon Pan	Tempatan
60	Macam Macam Berapit - The Penang Dhol Blasters (GTF 2019)	The Penang Dhol Blasters	Tempatan
61	Macam Macam Berapit - Culture Shot (GTF 2019)	Culture Shot (LA LA LI LA TAM PONG)	Tempatan
62	The New Adventures in Sound Art (GTF 2020)	Kamal Sabran, Tuti Noor, Beyowing, Olya, Hilyati Ramli, Arina Kokoreva, Emma Caterinicchio, Eric Hausmann, Diletta Brancatelli, dan Reza Othman.	Tempatan dan Antarabangsa
63	Absolute Penang (GTF 2020)	Teechew Puppet and Opera House, Pravinraj Premkumar, Kumaran Rajangam, Wak Long Music & Art Centre, Culture Shot.	Tempatan
64	Get Serenaded (GTF 2020)	Tiga Soul	Tempatan

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)13

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

13. Apakah usaha kerajaan untuk penambahbaikan fasiliti di Taman Negara Pulau Pinang dan pantai-pantai di negeri ini?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

13. Kerajaan Negeri telah melaksanakan tiga (3) projek di Taman Negara, Teluk Bahang di bawah Pakej Ransangan Ekonomi Tahun 2020 (PRE2020) iaitu:
- (i) menggantikan papan tanda awam dengan nilai projek RM19,460.25;
 - (ii) membaik pulih wakaf dengan nilai projek RM49,010.30; dan
 - (iii) membaik pulih jambatan dengan nilai projek RM72,980.00.

Selain itu, Taman Negara ini juga telah memperolehi peruntukan sebanyak RM5.16 juta di bawah RP-4 RMKe-11 melalui Kementerian Pelancongan, Seni dan Budaya Malaysia (MoTAC) untuk pembinaan jeti pelawat baharu dan tandas di kaunter pelawat, Sungai Tukun, Pantai Kerachut dan Teluk Kampi. Projek ini dijangka akan dijalankan pada Disember 2020 dan dijangka siap pada tahun 2022.

Usaha Kerajaan Negeri melalui Majlis Bandaraya Pulau Pinang (MBPP) untuk penambahbaikan fasiliti di kawasan pantai pula adalah seperti berikut:

- (i) Menaik taraf pembangunan fasiliti tandas awam seperti di Tandas Awam Pantai Mas dan Tandas Awam Pantai Miami di Batu Ferringgi menggunakan peruntukan kewangan Persekutuan;
- (ii) Menyelenggara keseluruhan kompleks tepi pantai yang di bawah pengurusan MBPP dengan peruntukan bajet tahunan sebanyak RM2 juta bagi tahun 2020;
- (iii) Menyediakan zon renang dan zon-zon bagi aktiviti sukan air di sekitar pantai Batu Ferringgi dengan menempatkan anggota penguatkuasa bagi kawalan aktiviti; dan
- (iv) Menyediakan papan tanda mengenai maklumat pengusaha aktiviti sukan air juga disediakan di setiap zon sebagai makluman kepada orang awam.

Bagi fasiliti pantai di kawasan Seberang Perai, Kerajaan Negeri melalui Majlis Bandaraya Pulau Pinang (MBSP) telah menaik taraf fasiliti-fasiliti di Pantai Robina Eko-Park dengan menyediakan tempat letak kenderaan, laluan basikal, wakaf, alat permainan kanak-kanak, lampu solar dan papan tanda.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)14

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

14. Di manakah lokasi-lokasi nelayan yang tidak akan terkesan dengan pembangunan negeri bagi menjamin warisan masyarakat setempat dapat dijaga untuk sektor pelancongan dan pendidikan di masa hadapan?

**YB. DR. HAJAH NORLELA BINTI ARIFFIN
MENJAWAB BAGI PIHAK Y.A.B. KETUA MENTERI**

14. (a) Lokasi-lokasi nelayan yang tidak terjejas sepenuhnya dengan pembangunan negeri yang menjamin warisan masyarakat setempat dari segi sektor pelancongan dan pendidikan adalah seperti berikut:
- (i) Batu Feringghi;
 - (ii) Teluk Bahang;
 - (iii) Pulau Kendi;
 - (iv) Zon Industri Akuakultur (ZIA) Penaga;
 - (v) Kuala Muda;
 - (vi) Nibong Tebal;
 - (vii) Sungai Aceh; dan
 - (viii) Sungai Udang.
- (b) Walaubagaimanapun, terdapat juga beberapa lokasi-lokasi nelayan yang terkesan secara langsung seperti di kawasan persisiran pantai

- (i) Tanjung Tokong,
- (ii) Persiaran Gurney,
- (iii) Jelutong,
- (iv) Bagan Ajam,
- (v) Permatang Damar Laut,
- (vi) Teluk Kumbar;
- (vii) Gertak Sanggul.

yang akan terkesan dengan projek-projek tambakan dan projek-projek infrastruktur sewaktu kerja-kerja pembinaan dilaksanakan.

- (c) Terdapat projek infrastruktur seperti pembinaan Jambatan Pulau Pinang dan Jambatan Kedua Pulau Pinang yang hanya memberi impak sementara sewaktu pembinaan dan seterusnya menyumbang kepada penangkapan hasil laut selepas pembinaan. Para nelayan yang ditemuduga sewaktu pengambilan data kajian menyatakan bahawa struktur-struktur konkrit telah menjadi kawasan pembiakan ikan dan hasil tangkapan adalah lebih banyak.

Justeru, projek-projek pembangunan negeri melalui projek-projek tambakan dan projek-projek infrastruktur juga dilihat sebagai projek pembangunan infrastruktur yang dapat membantu perkembangan ekonomi negeri dan negara.

Malah, projek-projek ini juga dijangka akan membantu aktiviti ekonomi di Pulau Pinang terutamanya dalam sektor perkhidmatan dan pembuatan, pelancongan serta pelancongan perubatan sebagai pemangkin kepada pemulihan ekonomi negeri khususnya dan negara amnya selepas terkesan dengan krisis pandemik COVID-19.

WORLD FISH MAP -attach

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)15

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

15. Berapakah jumlah keseluruhan bas-bas Rapid Penang berdasarkan nombor laluan?

**YB. ZAIRIL KHIR JOHARI
MENJAWAB BAGI PIHAK Y.A.B. KETUA MENTERI**

15. Jumlah keseluruhan bas Rapid Penang adalah sebanyak 404 buah dengan 53 laluan. Berdasarkan perancangan setiap minggu, 244 buah bas akan beroperasi pada setiap hari di semua 53 laluan.

Perincian bilangan bas dan nombor laluan adalah seperti jadual di bawah.

No.	Nombor bas/laluan	Mula	Akhir	Bilangan Bas
1	10	Jetty	Botanical Garden	1
2	11	Jetty	Batu Lanchang	4
3	12	Jetty	Bandar Sri Pinang	2
4	13	Paya Terubung	Tesco Tunku Kudin	1
5	101	Teluk Bahang	Jetty	18
6	102	Airport	Teluk Bahang	8

7	103	Komtar	Pulau Tikus (<i>via</i> Jalan Burma)	3
8	104	Tanjung Bungah	Komtar	2
9	201	Paya Terubung	Jetty (<i>via</i> Air Itam)	10
10	202	Paya Terubong	Jetty (<i>via</i> Farlim)	8
11	203	Air Itam	Jetty (<i>via</i> Farlim)	4
12	204	Penang Hill	Jetty (<i>via</i> Kg. Melayu)	6
13	206	Jetty	Tesco Tunku Kudin	4
14	301	Relau	Jetty	8
15	302	Batu Maung	Jetty	13
16	303	Bukit Gedung	Jetty	8
17	304	Bukit Gedung	Plaza Gurney (<i>via</i> Komtar)	6
18	305	Sg. Nibong	Teluk Tempoyak	0
19	306	Airport	Hospital (<i>via</i> Farlim)	4
20	308	Sg. Nibong	Gertak Sanggul	4
21	401	Teluk Kumbar (Puspakom)	Jetty	5
22	401E	Balik Pulau	Jetty	10
23	403	Balik Pulau	Pulau Betong	1
24	404	Balik Pulau	Pantai Aceh	1
25	501	Balik Pulau	Teluk Bahang	1
26	502	Balik Pulau	Jetty (<i>via</i> Air Itam)	8

27	601	Penang Sentral	Kepala Batas	5
28	601A	Kepala Batas	Pinang Tunggal	1
29	603	Penang Sentral	Kuala Muda	3
30	604	Penang Sentral	Desa Murni	2
31	604A	Desa Murni	Kepala Batas	1
32	605	Penang Sentral	Pekan Darat	3
33	606	Kepala Batas	Bukit Mertajam	2
34	610	Kepala Batas	Tasek Gelugor	1
35	613	Penang Sentral	Padang Serai	3
36	701	Penang Sentral	Bukit Mertajam	10
37	702	Penang Sentral	Bukit Mertajam (via Permatang Pauh)	5
38	706	Taman Pelangi	Penang Sentral	2
39	707	Taman Pelangi	Bukit Mertajam (via Juru, Bukit Minyak, Kota Permai)	2
40	708	Bukit Mertajam	Junjong	3
41	709	Penang Sentral	Bukit Mertajam – Machang Bubok	3

42	801	Penang Sentral	Nibong Tebal	8
43	802	Nibong Tebal	Bukit Mertajam	7
44	803	Nibong Tebal	Sungai Acheh	1
45	804	Nibong Tebal	Parit Buntar	1
46	BKB	Bertam	Komtar	3
47	BKBP	Balik Pulau	Komtar	1
48	BKJ	Jawi	Komtar	1
49	BKS	Sunway	Komtar	3
50	CAT	Jetty	Komtar	5
51	CAT13	Sunway Seberang Jaya	Terminal Bayan Baru	18
52	EB60	Penang Sentral	Sungai Petani	5
53	EB80	Penang Sentral	Parit Buntar	5
JUMLAH				244

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)16

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

16. Apakah bantuan kebajikan terhadap ibu tunggal yang tidak pernah berkahwin memandangkan mereka tidak layak untuk memohon sumbangan ibu tunggal?

**YB. CHONG ENG
MENJAWAB BAGI PIHAK Y.A.B KETUA MENTERI**

16. Antara bantuan kebajikan yang layak dimohon oleh ibu tunggal yang tidak pernah berkahwin adalah seperti berikut:

(i) **Bantuan Am**

Bantuan Am minimum RM220.00 dan maksimum RM770.00 berdasarkan bilangan tanggungan dan pendapatan perkapita kurang daripada RM260.00. Bantuan ini boleh dimohon melalui Jabatan Kebajikan Masyarakat (JKM) Negeri Pulau Pinang.

(ii) **Elaun Pekerja Cacat**

Ibu tunggal daripada golongan kurang upaya yang bekerja dan mempunyai pendapatan kurang RM1,200.00 layak menerima elaun berjumlah RM400.00. Elaun ini boleh dimohon melalui JKM Negeri Pulau Pinang.

(iii) **Bantuan Kanak-Kanak**

Ibu tunggal yang menjadi penjaga kepada kanak-kanak boleh memohon bantuan kanak-kanak yang mana bantuan minimum RM100.00 dan maksimum RM450.00 berdasarkan bilangan anak dan pendapatan garis

kemiskinan (PGK) tidak melebihi RM960.00. Bantuan ini boleh dimohon melalui JKM Negeri Pulau Pinang.

(iv) **Bantuan Orang Kurang Upaya (OKU) Tidak Berupaya Bekerja (BTB)**

Ibu tunggal yang memegang kad OKU dan tidak berupaya untuk bekerja boleh memohon bantuan ini. Bantuan sebanyak RM250.00 akan diberikan kepada OKU yang tidak berupaya bekerja dan sumber kewangan bulanan individu OKU tidak melebihi kadar Pendapatan Garis Kemiskinan (PGK) RM960.00. Bantuan ini boleh dimohon melalui JKM Negeri Pulau Pinang.

(v) **Bantuan Orang Tua**

Ibu tunggal yang berumur 60 tahun ke atas boleh memohon bantuan ini. Bantuan sebanyak RM350.00 diberikan kepada yang layak dan pendapatan isi rumah tidak melebihi Pendapatan Garis Kemiskinan (PGK) RM960.00. Bantuan ini boleh dimohon melalui JKM Negeri Pulau Pinang.

(vi) **Skim Pinjaman Harapan (SPH)**

Kerajaan Negeri melalui Perbadanan Pembangunan Pulau Pinang (PDC) menyediakan skim pinjaman ini kepada penjaja dan peniaga kecil. Pinjaman ini disalurkan tanpa cagaran dan penjamin dengan pinjaman antara RM1,000.00 sehingga maksimum RM25,000.00. Skim pinjaman ini boleh dimohon melalui PDC.

(vii) **Tabung Usahawan Tani (TUT)**

TUT diwujudkan untuk memberikan dorongan kepada petani, penternak dan nelayan yang berumur 18 hingga 60 tahun untuk menjadikan sektor industri asas tani sebagai kerjaya yang berpotensi menjana punca pendapatan yang lumayan. TUT menyediakan pinjaman tanpa faedah dengan jumlah maksimum RM6,000.00 kepada usahawan muda berumur bawah 40 tahun dan RM5,000.00 bagi yang berumur 60 tahun ke bawah dalam sektor pertanian, penternakan dan perikanan. Peruntukan ini boleh dimohon melalui Jabatan Pertanian Negeri Pulau Pinang / Jabatan

Perkhidmatan Veterinar Pulau Pinang / Jabatan Perikanan Negeri Pulau Pinang berdasarkan jenis sektor.

(viii) Program Peningkatan dan Pemulihan Ekonomi (Bantuan Peralatan)

Program ini adalah untuk peniaga kecil sepenuh masa yang menjalankan perniagaan sekurang-kurangnya satu (1) tahun dan berpendapatan RM3,000.00 sebulan. Bantuan ini diberikan untuk mengembangkan perniagaan sedia ada bagi memperolehi hasil yang lebih lumayan. Bantuan ini boleh dimohon melalui Pejabat Daerah dan Tanah.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)17

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

17. Apakah rancangan Kerajaan Negeri untuk mencari penyelesaian terhadap peletakan kereta oleh pekerja-pekerja kompleks membeli-belah di kawasan-kawasan perumahan?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

17. Setakat ini, Kerajaan Negeri mendapati kawasan Seberang Perai tidak mempunyai masalah tempat letak kereta dikalangan pekerja kompleks membeli-belah di kawasan perumahan kerana tempat letak kereta bagi kawasan komersial dan kompleks membeli-belah masih dapat menampung keperluan pekerja dan pelanggan. Di Bahagian Pulau pula bagi mengurangkan masalah tempat letak kereta oleh pekerja-pekerja kompleks membeli-belah di kawasan-kawasan perumahan adalah disarankan pekerja-pekerja mengamalkan *car pooling* ataupun menggunakan perkhidmatan bas awam percuma seperti bas Central Area Transit (CAT) atau *e-hailing*.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)18

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

18. Apakah perkembangan rancangan Kerajaan Negeri untuk memberi lesen kepada pusat-pusat jagaan warga emas?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

18. Kerajaan Negeri baru-baru ini hampir memuktamadkan Garis Panduan Pusat Jagaan Warga Emas di Pulau Pinang. Tujuan garis panduan ini diwujudkan adalah untuk mempermudah dan mempercepatkan proses pendaftaran dan pemberian lesen operasi. Senarai pengecualian yang akan diberikan kepada pengusaha adalah seperti berikut:

- (i) Pengecualian sumbangan tempat letak kereta;
- (ii) Pengecualian sumbangan bagi penanaman pokok;
- (iii) Pengecualian denda 10 kali ganda daripada fi permohonan;
- (iv) Pengecualian untuk pendaftaran sehingga 30 Jun 2021; dan
- (v) Penetapan kadar tetap pendaftaran infrastruktur (tukar guna) sebanyak RM1,000.00

Garis panduan ini dijangka akan disiapkan oleh Bahagian Kerajaan Tempatan pada bulan Oktober 2020 untuk dibentangkan kepada Pihak Berkuasa Negeri. Pusat-pusat Jagaan Warga Emas yang telah mematuhi syarat permohonan lesen operasi boleh memohon lesen daripada Pihak Berkuasa

Tempatan (PBT) dan perakuan pendaftaran daripada pihak Jabatan Kebajikan Malaysia (JKM).

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)19

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

19. Apakah rancangan Kerajaan Negeri untuk menolong usahawan-usahawan tempatan untuk memulakan perniagaan?

**YB. DATO' HAJI ABDUL HALIM BIN HAJI HUSSAIN
MENJAWAB BAGI PIHAK Y.A.B. KETUA MENTERI**

19. Antara inisiatif yang dijalankan oleh Kerajaan Negeri untuk menolong usahawan-usahawan tempatan untuk memulakan perniagaan adalah seperti berikut:
- (i) Menubuhkan Pusat S.M.A.R.T (*SME Market Advisory, Resource & Training – S.M.A.R.T Centre*) sebagai titik hubungan usahawan dan perniagaan SME untuk mendapat khidmat nasihat dan maklumat perniagaan terkini dan inisiatif seperti penyenaraian direktori atas talian (*online directory listing*), bengkel pembangunan keupayaan (*capability building workshop*) dan sesi pepadanan perniagaan (*business matching events*) juga membantu mengembangkan perniagaan mereka. Setakat September 2020, pusat ini telah membantu dalam pemberian bantuan nasihat kepada 1,665 syarikat, 589 pasangan syarikat berjaya dipadankan dalam pepadanan perniagaan, dan 82 bengkel pembangunan dan seminar telah dianjurkan sejak penubuhannya pada Jun 2010;

- (ii) Membangunkan Pusat SME Pulau Pinang di Kawasan Perindustrian Bayan Lepas oleh Perbadanan Pembangunan Pulau Pinang (PDC) dengan objektif untuk membantu usahawan-usahawan baru dan sedia ada bagi mengurangkan kos operasi mereka dengan menyediakan ruang operasi dengan kadar sewa bersubsidi. Kadar sewa bermula dari RM1.50 sekaki persegi sebulan dan kemudahan yang disediakan termasuk lif, bilik mesyuarat, bilik pantri, lif kargo, kamera pengawasan dan ruang utiliti;
- (iii) Menempatkan IKS secara berkelompok dengan pembinaan perkampungan-perkampungan IKS (SME Village) di kawasan perindustrian Batu Kawan dan Bukit Minyak. Perkampungan IKS ini bermatlamat untuk mewujudkan rantai bekalan yang kukuh dan lengkap dan membantu membentuk hubungan antara IKS dengan syarikat multinasional. Sebanyak 22 ruangan IKS berbentuk berkembar (semi-D), 43 unit ruangan jenis teres, 2 unit jenis *bungalow* dan 8 jenis kluster bertempat di Kawasan Perindustrian Batu Kawan dan Kawasan Perindustrian Bukit Minyak;
- (iv) Menyediakan dana "*The Penang i4.0 Seed Fund*" yang menawarkan pembiayaan sehingga RM250,000 untuk membantu syarikat "*tech start up*" yang mempunyai produk dan perkhidmatan teknologi inovatif untuk mencapai pengkomersialan. Selain itu, perkhidmatan tambah nilai seperti "*mentorship*" dan "*linkages*" juga turut disediakan. Setakat September 2020, sebanyak RM3.2 juta telah diagihkan kepada 27 syarikat "*tech start-up*" yang layak;
- (v) Penubuhan Penang Automation Cluster (PAC) di atas tanah seluas 5 ekar di Taman Perindustrian Batu Kawan (BKIP). Ia merupakan "*one-stop metal component supply chain*" yang bertujuan untuk membantu IKS tempatan untuk mempertingkatkan daya saing dalam industri automotif. Projek tersebut mendapat sokongan daripada MIDA dan insentif akan diberikan kepada penyewa-penyewa IKS yang beroperasi di PAC;

- (vi) Penganjuran kursus-kursus keusahawanan bagi menambah ilmu dan pengetahuan berkaitan perniagaan;
- (vii) Penganjuran program kesedaran bagi memotivasikan usahawan untuk memantapkan perniagaan dari semasa ke semasa; dan
- (viii) Kerjasama Kerajaan Negeri dengan agensi-agensi Kerajaan Negeri serta Kerajaan Persekutuan bagi menawarkan pakej-pakej bantuan yang menarik bagi membantu usahawan untuk mengembangkan perniagaan di pasaran tempatan dan antarabangsa.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)20

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

20. Apakah rancangan Kerajaan Negeri untuk menubuhkan lebih perpustakaan digital atau *digital library* di seluruh Negeri Pulau Pinang?

**YB. PROF. DR. P. RAMASAMY A/L PALANISAMY
MENJAWAB BAGI PIHAK Y.A.B. KETUA MENTERI**

20. Kerajaan Negeri tidak berhasrat untuk menubuhkan lebih banyak perpustakaan digital di seluruh Negeri Pulau Pinang secara fizikal memandangkan konsep perpustakaan digital adalah penggunaan atau akses bahan bacaan elektronik secara atas talian dari mana-mana lokasi atau bangunan. Walau bagaimanapun, tambahan kepada perpustakaan digital yang sedia ada, Kerajaan Negeri melalui Perbadanan Ketua Menteri (CMI) akan mengenal pasti projek sedia ada yang bersesuaian di Daerah Seberang Perai Tengah dan Seberang Perai Selatan untuk diwujudkan satu sudut perpustakaan digital bagi pengaksesan bahan bacaan elektronik secara maya.

Selain itu, orang awam dan pihak sekolah juga boleh mengakses perpustakaan digital secara atas talian dengan pembelian keahlian *e-card* daripada Perpustakaan Digital Pulau Pinang (PDL) melalui laman sesawang www.penangdigitallibrary.com.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)21

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

21. Apakah rancangan Kerajaan Negeri untuk menambah baik sistem *Penang Smart Parking*?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

21. Kerajaan Negeri sememangnya amat komited dalam usaha untuk menjayakan visi Negeri Pintar di Negeri Pulau Pinang melalui pelaksanaan projek *Penang Smart Parking* (PSP). Sehubungan dengan itu, Kerajaan Negeri sedang merancang untuk melakukan penambahbaikan kepada sistem PSP terutamanya melalui tiga (3) fungsi utama PSP iaitu bayaran Tempat Letak Kereta (TLK) secara *online*, navigasi dan penguatkuasaan seperti berikut:

- (i) Fungsi bayaran TLK secara *online*

Seperti aplikasi–aplikasi TLK pintar yang lain, pengguna aplikasi PSP boleh membuat bayaran TLK secara *online*. Antara cadangan bagi menambahbaik sistem bayar TLK adalah dengan menambah jumlah saluran bayaran TLK melalui pembangunan platform *e-Wallet* untuk membolehkan bayaran kompaun PSP dibuat melalui beberapa pilihan platform *e-Wallet*. Selain daripada pembayaran parkir, pembelian pas bulanan dan pembayaran kompaun, Kerajaan Negeri juga bercadang untuk membolehkan pelbagai bayaran kompaun lain dilakukan melalui aplikasi PSP pada masa hadapan.

(ii) Fungsi navigasi TLK

Bagi menambah baik fungsi navigasi TLK, pihak HeiTech Padu Berhad sedang melaksanakan ujian ketepatan *sensor* bagi membolehkan pengguna mengenal pasti lokasi dan petak–petak TLK kosong berdekatan dengan destinasi pengguna. Petak–petak parkir kosong ini dapat dikenal pasti dengan adanya sensor di setiap petak TLK. Sensor ini menggunakan kombinasi teknologi *Internet of Things* (IoT) dan *cloud computing* untuk membekalkan pengguna dan Pihak Berkuasa Tempatan (PBT) dengan *real-time* data.

(iii) Fungsi Penguatkuasaan

Pada ketika ini, pihak penguat kuasa PBT dapat mengenal pasti kenderaan yang tidak membayar caj TLK dan akan mengeluarkan kompaun menggunakan alatan penguatkuasaan yang telah dibekalkan. Justeru, bagi menambah baik fungsi penguatkuasaan dalam aplikasi PSP ini, Kerajaan Negeri sedang mengusahakan supaya pengeluaran kompaun lain seperti kompaun warden trafik, kompaun kapit tunda dan kompaun lain-lain jabatan di bawah PBT juga dapat dikeluarkan melalui alatan penguatkuasaan yang dibekalkan kepada penguat kuasa bertugas.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)22

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

22. Adakah pihak PBT dan pihak Kerajaan Negeri berhasrat untuk menyediakan *mechanical carpark* seperti Menara M Summit dalam tiga (3) tahun akan datang?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

22. Kerajaan Negeri dan kedua - dua Pihak Berkuasa Tempatan (PBT) masih belum mempunyai perancangan bagi menyediakan *mechanical carpark* seperti yang terdapat di Menara M Summit dalam masa tiga (3) tahun akan datang. Walau bagaimanapun, bagi projek pembangunan pemajuan baharu oleh pihak swasta yang meliputi pembinaan *mechanical carpark* adalah dibenarkan. Sebagai contoh, pihak PBT telah meluluskan satu (1) pembinaan *mechanical car park* oleh pihak swasta melalui Pelan Kebenaran Merancang bagi pemajuan di Jalan Raja Uda, Butterworth.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)23

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

23. Apakah rancangan Kerajaan Negeri untuk menolong rakyat Negeri Pulau Pinang mempelajari kemahiran-kemahiran yang relevan dalam dunia globalisasi?

**YB. PROF. DR. P. RAMASAMY A/L PALANISAMY
MENJAWAB BAGI PIHAK Y.A.B. KETUA MENTERI**

23. Kerajaan Negeri sentiasa memberi fokus untuk memperkasakan pembelajaran *Science, Technology, Engineering & Mathematics* (STEM) di negeri Pulau Pinang untuk menyokong perkembangan kemahiran dan mempertingkatkan daya saing rakyat negeri Pulau Pinang dalam era globalisasi. Oleh yang demikian, Kerajaan Negeri telah melaksanakan beberapa inisiatif seperti berikut:
- (i) Menubuhkan Penang Science Cluster (PSC) untuk orang awam belajar, berinteraksi dan menjalankan aktiviti berkaitan dengan bidang sains dan teknologi. Antara aktiviti utama yang dijalankan oleh PSC untuk mempersiapkan pelajar dan orang awam dengan kemahiran seperti robotik dan pengekodan adalah program *TechMentor*, *Penang International Science Fair* (PISF), *Science Café* dan inisiatif *Coding-For-All* dan *MakerLab*;
 - (ii) Menubuhkan *Creative Animation Trigger* (@CAT) untuk mempromosi bidang sains, teknologi dan animasi kreatif di negeri ini. @CAT bertempat di Wisma Yeap Chor Ee dan berfungsi mempercepatkan penubuhan serta pertumbuhan syarikat-syarikat kreatif baharu berasaskan teknologi, memupuk bakat-bakat baharu dalam bidang *cloud*

computing, aplikasi teknologi, *big data analytics* (BDA) dan *internet of things* (IOT);

- (iii) Menubuhkan *Tech Dome Penang* (TDP) di KOMTAR bagi memupuk minat dalam bidang sains, inovasi teknologi dan keusahawanan. TDP menyediakan platform kepada semua lapisan masyarakat untuk menerokai keajaiban sains dan teknologi serta menganjurkan program-program seperti kem sains, pameran sains, bengkel dan seminar pendidikan yang melibatkan pelbagai lapisan masyarakat;
- (iv) Bekerjasama dengan *Penang Skills Development Centre* (PSDC) yang memainkan peranan untuk melatih modal insan dalam pelbagai bidang kemahiran bagi memenuhi kehendak industri berasaskan teknologi tinggi di negeri ini. Antara program khusus yang menjadi agenda utama Kerajaan Negeri melalui PSDC ialah dalam bidang Teknologi Pemesinan Kepersisan, Kejuruteraan (Komputer, Elektronik, Mekatronik, Telekomunikasi), dan Teknologi Pembuatan (CAD/CAM). Kerajaan Negeri juga telah membangunkan sistem pendidikan vokasional ala negara Jerman iaitu *Malaysian Meister Program* (MMP) di negeri Pulau Pinang. Melalui sistem ini, pusat latihan akan didirikan di kilang-kilang serta syarikat-syarikat perniagaan bagi membolehkan pelajar mempelajari secara teori dan praktikal pada masa yang sama.

Selain itu, Kerajaan Negeri melalui Digital Penang juga akan mengupah seramai 32 orang *Digital Coach* untuk membangunkan kemahiran penggunaan teknologi digital asas rakyat negeri Pulau Pinang. *Digital Coach* akan mengendalikan kelas dan bengkel untuk mengajar orang ramai terutamanya golongan warga emas dan luar bandar cara penggunaan teknologi digital asas. Modul pengajaran yang akan disediakan adalah seperti berikut:

- (i) Pengurusan maklumat dan komunikasi (Contoh: emel, sosial media, panggilan video atas talian)
- (ii) Transaksi digital (Contoh: perbankan atas talian, *eWallet*, dan *e-hailing*)

- (iii) Aplikasi kerajaan (Contoh: *Penang Smart Parking*)
- (iv) Keselamatan siber (Contoh: berita palsu, keselamatan data peribadi)

Digital Penang juga bekerjasama dengan Facebook untuk mengendalikan program latihan pemasaran digital kepada perusahaan kecil dan sederhana serta individu yang berminat untuk ditauliahkan sebagai jurulatih pemasaran digital oleh Facebook. Di samping itu, Perbadanan Pembangunan Belia Pulau Pinang (PYDC) juga telah melancarkan *Penang Digital Programme* yang berhasrat untuk melatih 1,000 orang remaja yang berkemahiran dalam pemasaran digital.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)24

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

24. Adakah Kerajaan Negeri mempunyai rancangan untuk menjadikan Negeri Pulau Pinang sebagai sebuah destinasi untuk penggambaran filem?

**YB. YEOH SOON HIN
MENJAWAB BAGI PIHAK Y.A.B. KETUA MENTERI**

24. Kerajaan Negeri mempunyai rancangan untuk menjadikan Negeri Pulau Pinang sebagai sebuah destinasi untuk penggambaran filem. Antara inisiatif-inisiatif yang telah dilaksanakan adalah seperti berikut:
- (a) Memberi perkhidmatan sokongan kepada agensi-agensi penggambaran filem, drama, rancangan televisyen realiti, dan filem khususnya dari Asia dan Eropah. Perkhidmatan sokongan yang ditawarkan oleh *Penang Global Tourism* (PGT) adalah seperti koordinasi, pelesenan dan sebagainya untuk melancarkan proses produksi filem; dan
 - (b) Kolaborasi antara *Penang Convention & Exhibition Bureau* (PCEB) dengan Indian Admakers Association untuk membawa masuk agensi-agensi penggambaran filem dari negara India ke Pulau Pinang.

Senarai produksi yang telah dijalankan di Pulau Pinang adalah seperti di **LAMPIRAN A**.

LAMPIRAN A

SENARAI PRODUKSI YANG TELAH DIJALANKAN DI PULAU PINANG

	Production Name	Production Genre	Origin
2017	Anna's Lover	TV Series	China
	Pesona Malaysia	Documentary	Malaysia
	Li Fang Jie	TV Series	China
	See The World by Train in Malaysia	Documentary	Japan
	Ainori	Documentary	Malaysia
	Top Pick! Malaysia	Documentary	Malaysia
	National Geography x Malaysia Tourism	Documentary	Malaysia
	You Me & Malaysia	Documentary	Malaysia
	Little Nyonya	TV Series	China
2018	The City of Chaos	Movie	Malaysia
	Twenty-Four Hours Season 3	TV Show	China
	Operasi X	Movie	Malaysia
	Blessing 2	TV Series	Singapore
	The Unforgiven	Movie	Malaysia
	Bazaar Carnival	TV Show	Hong Kong
	Strike Back Season 7	TV Series	UK/USA
	Crazy Rich Asian	Movie	USA
	The Leakers	Movie	Hong Kong
	Sidewalk Scientists	TV Show	Hong Kong
	The World in One Day	TV Show	Hungary
2019	Bazaar Carnival Season 2	TV Show	Hong Kong
	Let's Go Let's Eat	TV Show	Russia
	The Ghost Bride	TV Series	Malaysia/Taiwan/USA
	Project Busking	TV Show	Malaysia
	鬧著玩	TV Show	Taiwan
	Off The Grip	TV Show	Hong Kong
	Street Food Fighter	TV Show	South Korea
	A Chef and A Gentlemen	TV Show	Hong Kong
2020	Secret Mission	Movie	Malaysia
	Operation Overseas	Movie	Malaysia
	The Singapore Grip	TV Series	UK
	David Roccas Dolce Southeast Asia	TV Show	USA

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)25

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

25. Adakah Kerajaan Negeri mempunyai rancangan untuk memulakan industri mereka bentuk permainan elektronik atau "eGames"?

**YB. DATO' HAJI ABDUL HALIM BIN HAJI HUSSAIN
MENJAWAB BAGI PIHAK Y.A.B. KETUA MENTERI**

25. Kerajaan Negeri akan terus menjadikan industri mereka bentuk permainan elektronik atau "eGames" (kandungan digital) sebagai salah satu industri tumpuan di Pulau Pinang selain daripada industri utama seperti *Electrical and Electronic* (E&E), peranti perubatan dan "*Global Business Services*".

Kerajaan Negeri melalui InvestPenang sedang giat mempromosi dan mengiktiraf industri ini sebagai salah satu daripada enjin penting bagi pertumbuhan ekonomi memandangkan industri ini dilihat mampu mewujudkan lebih banyak peluang pekerjaan berkualiti untuk warga Pulau Pinang, selaras dengan usaha menjadikan ekonomi negeri berteraskan bidang berteknologi dan bernilai tinggi serta berintensifkan pengetahuan bagi memperkukuh daya saing diperingkat global.

Kerajaan Negeri komited untuk menjadikan Pulau Pinang sebagai destinasi menarik untuk industri berteknologi dan bernilai ditambah tinggi, justeru pelbagai usaha telah dijalankan bagi merealisasikan seperti penubuhan *Creative Animation Trigger* (CAT) pada tahun 2015 lagi dan ia mencerminkan usaha Kerajaan Negeri dalam mempromosikan bidang sains, teknologi dan animasi kelompok kreatif di negeri ini dan

program ini telah ditempatkan di salah sebuah bangunan bersejarah dalam kawasan warisan UNESCO, Wisma Yap Chor Ee (WYCE).

Buat masa ini, Pulau Pinang mempunyai beberapa syarikat luar dan tempatan yang terkemuka yang terlibat dalam industri merekabentuk permainan elektronik atau "eGames" (kandungan digital) seperti Lemon Sky Animation, Left Pocket, Loduz e com, Vilor, Game Pro dan sebagainya.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)26

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

26. Apakah rancangan alternatif Kerajaan Negeri untuk menolong warga emas yang tidak fasih peralatan elektronik untuk meletak kereta?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

26. Kerajaan Negeri menyedari kewujudan jurang antara generasi dalam pelaksanaan Negeri Pintar khususnya dalam pelaksanaan projek *Penang Smart Parking* (PSP). Oleh yang demikian, beberapa langkah telah diambil bagi mengatasi isu tersebut seperti berikut:
- (i) Menyediakan tiket letak kereta secara e-kupon yang boleh dibeli daripada ejen-ejen yang dilantik untuk memudahkan pengguna yang tidak mempunyai telefon pintar. Setakat ini 235 ejen e-kupon di seluruh Negeri Pulau Pinang telah dilantik dengan 198 ejen di kawasan Pulau manakala 37 ejen e-kupon pula di kawasan Seberang Perai;
 - (ii) Mendekati golongan warga emas dengan menjalankan program dan aktiviti sosial di tempat yang kerap dikunjungi warga emas seperti pasar awam, pasar malam, pusat membeli belah dan program-program masyarakat anjuran ADUN-ADUN kawasan;
 - (iii) Menyediakan kaunter pertanyaan *walk-in* berkenaan PSP pada setiap hari Khamis di kedua PBT bagi membantu

warga emas dan pengguna lain yang mempunyai pertanyaan tentang penggunaan PSP;

- (iv) Menyediakan talian hotline dan kaunter pertanyaan *walk in* pada setiap hujung bulan di KOMTAR bagi membantu warga emas dan pengguna lain yang mempunyai masalah dalam penggunaan PSP;
- (v) Warga emas yang tidak mempunyai telefon pintar juga boleh meminta bantuan anak-anak atau saudara-mara mereka untuk membeli atau menambah nilai tiket letak kereta;
- (vi) Mengedarkan borang kaji selidik bagi mengetahui permasalahan dan kekangan yang dihadapi oleh golongan warga emas dalam penggunaan PSP dan menambah baik fungsi PSP dari semasa ke semasa bagi memenuhi keperluan dan memberikan kemudahan kepada semua pihak; dan
- (vii) Menganjurkan *Penang Smart Parking Senior Citizen Outreach Program* bersama Persatuan Rose Charity pada 2 Februari 2020 bertempat di Pusat Sumber Digital Warga Emas Pulau Pinang. Taklimat dan latihan mengenai cara penggunaan aplikasi PSP telah dijalankan semasa program ini diadakan.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)27

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

27. Apakah rancangan masa depan Kerajaan Negeri Pulau Pinang untuk memajukan pasar Pulau Tikus?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

27. Setakat ini Kerajaan Negeri Pulau Pinang tidak mempunyai perancangan untuk memajukan pasar Pulau Tikus memandangkan keadaan pasar yang masih baik. Walau bagaimanapun, pihak Majlis Bandaraya Pulau Pinang (MBPP) telah menyediakan peruntukan secara tahunan untuk melaksanakan kerja-kerja penyelenggaraan dan pembersihan di pasar Pulau Tikus.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)28

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

28. Apakah rancangan Kerajaan Negeri untuk memastikan semua pantai-pantai di sekitar Negeri Pulau Pinang akan kekal bersih?

**YB. ZAIRIL KHIR JOHARI
MENJAWAB BAGI PIHAK Y.A.B. KETUA MENTERI**

28. Jabatan Pengairan dan Saliran (JPS) Pulau Pinang bertanggungjawab bagi memastikan pantai-pantai di Negeri Pulau Pinang berada dalam keadaan baik dan kekal bersih. Oleh itu, terdapat beberapa inisiatif dan projek yang telah dilaksanakan oleh JPS pada tahun 2020 bagi mengekalkan kebersihan pantai-pantai seperti berikut:
- (i) Kerja-kerja Membaik pulih Pantai Lingkaran Luar Butterworth (LLB) di Seberang Perai Utara di Pantai Bagan Ajam dengan kos sebanyak RM435,226.00 bermula pada 18 Mei 2020 dan siap pada 02 November 2020;
 - (ii) Membaik pulih Muara Sungai Abdul, dengan kos sebanyak RM168,600.00 bermula pada 11 Ogos 2020 dan siap pada 11 November 2020;
 - (iii) Mengorek Muara Sungai Lahar Indin dengan kos sebanyak RM165,450.00 bermula pada 23 Jun 2020 dan siap pada 23 September 2020;
 - (iv) Kerja-kerja Mencegah Hakisan Pantai Bersih dan Lain Kerja-Kerja Berkaitan dengan kos sebanyak RM173,254

bermula pada 13 Julai 2020 dan siap pada 13 Oktober 2020;

- (v) Mengorek di Muara Sungai Tembus dengan kos sebanyak RM92,690.00 bermula pada 25 September 2020 dan siap pada 6 November 2020;
- (vi) Kerja-kerja Pencegahan Hakisan Pantai di Struktur *Culvert* berhampiran Flamingo Hotel dan lain-lain kerja pembaikan dengan kos sebanyak RM32,510.00 bermula pada 15 Oktober 2020 dan siap pada 10 Disember 2020; dan
- (vii) Kerja-kerja Membaik pulih dan Mengukuhkan Tembok Penahan Ombak di Banglo VIP, Batu Feringgi, Daerah Barat Daya dengan kos sebanyak RM168,512.00 bermula pada 9 September 2020 dan siap pada 2 Disember 2020.

Selain itu, JPS juga melaksanakan pemantauan secara berkala tahap keadaan pantai untuk memastikan pantai-pantai berada dalam keadaan baik dan bersih.

Pihak Berkuasa Tempatan (PBT) juga memainkan peranan penting dalam memastikan semua pantai di sekitar negeri Pulau Pinang kekal bersih dengan melaksanakan inisiatif seperti berikut:

- (i) Menjalankan kerja-kerja pembersihan secara berkala di kawasan pantai yang menjadi tumpuan orang ramai;
- (ii) Menggalakkan aktiviti gotong-royong bersama masyarakat setempat, sekolah-sekolah, pihak swasta dan juga Badan Bukan Kerajaan (NGO) dengan PBT menyediakan peralatan gotong-royong yang bersesuaian di kawasan pantai; dan
- (iii) Mengadakan kerjasama strategik antara agensi / jabatan kerajaan seperti Jabatan Pengairan dan Saliran (JPS), Jabatan Alam Sekitar (JAS), Pejabat Daerah dan Tanah (PDT) serta lain-lain yang berkaitan bagi aktiviti penguatkuasaan sekiranya berlaku pencemaran di kawasan pantai.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)29

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

29. Apakah rancangan masa depan sukan bola sepak Pulau Pinang?

- (a) Adakah Kerajaan Negeri akan terus menolong pasukan bola sepak Pulau Pinang?

**YB. SOON LIP CHEE
MENJAWAB BAGI PIHAK Y.A.B. KETUA MENTERI**

29. Perancangan masa depan bola sepak Pulau Pinang adalah seperti berikut:

- (i) Bekerjasama dengan akademi-akademi bola sepak di Pulau Pinang bagi mencungkil dan melahirkan bakat-bakat baru yang berkualiti untuk beraksi bersama Persatuan Bola Sepak Pulau Pinang (FAP) pada masa hadapan;
- (ii) Membuat saringan pemain-pemain muda dari Piala Presiden dan Piala Belia yang berkualiti untuk diserap masuk kedalam pasukan utama Pulau Pinang;
- (iii) FAP akan membangunkan sebuah Akademi Bola Sepak dalam melahirkan pelapis-pelapis yang berkualiti bagi pasukan bola sepak Pulau Pinang; dan
- (iv) Meningkatkan kualiti pengadilan (*Pro Coaching License*).

FAP akan diswastakan dan beroperasi sebagai kelab bola sepak Pulau Pinang (PFC) mulai tahun 2021. Syarikat swasta yang mengambil alih PFC akan bertanggungjawab sepenuhnya

dalam membangun dan menguruskan Pasukan Bola Sepak Liga Premier, Piala Presiden dan Piala Belia. Walau bagaimanapun, kerajaan negeri komited untuk membantu Persatuan Bola Sepak Pulau Pinang (FAP) demi menjaga kebajikan pemain-pemain.

**MESYUARAT KEDUA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
12 OKTOBER 2020**

PERKARA : 4(B)(X)30

**SOALAN BERTULIS OLEH AHLI KAWASAN PULAU TIKUS
YB. LEE CHUN KIT**

30. Apakah perkembangan inisiatif untuk menyelaraskan penggalan untuk menambatkan utiliti awam untuk mengurangkan penggalan jabatan-jabatan berlainan dalam tempat yang sama?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

30. Inisiatif-inisiatif yang telah diambil oleh Kerajaan Negeri bagi menyelaraskan penggalan utiliti awam untuk mengurangkan penggalan jabatan-jabatan berlainan pada jalan yang sama adalah seperti berikut:
- (i) Mengadakan mesyuarat penyelarasan utiliti pada setiap bulan sebagai langkah memantau kemajuan kerja setiap permit penggalan jalan yang telah dikeluarkan kepada syarikat utiliti yang berlainan pada tempat yang sama bagi mengelakkan pengorekan jalan yang berulang;
 - (ii) Mewujudkan pangkalan data bersepadu bagi pemetaan utiliti oleh pihak Jabatan Ukur dan Pemetaan Malaysia (JUPEM) Pulau Pinang bagi mengumpul maklumat mengenai pemasangan infrastruktur/ utiliti bawah tanah sebagai pusat rujukan oleh semua agensi dalam merancang kerja-kerja pengorekan jalan; dan

- (iii) Mensyaratkan syarikat-syarikat utiliti untuk melaksanakan kaedah kerja pengorekan secara *Horizontal Directional Drilling* (HDD) atau *Pipe Jacking* bagi jalan-jalan yang perlu dikorek setelah kerja penurapan jalan baharu dibuat.